

Timor Resources haruka ona amostra mina posu lafaek ba Indonézia



*Jerente Timor Resources, Filomeno Andrade.
Imajen Tatoli/Celestina Teles.*

COVALIMA, 26 maiu 2023 (TATOLI)—Kompañia Internasionál Timor Resources haruka ona amostra mina hosi posu Lafaek iha suku Labarai, postu administrativu Suai, munisípiu Covalima ba laboratóriu iha Indonézia hodi halo analiza.

Jerente Timor Resources, Filomeno Andrade, hateten, amostra hosi posu mina rai-maran Lafaek ne'e, kompañia Timor Resources haruka ona iha semana kotuk fulan ne'e ba Indonézia atu halo analiza.

“Ia prosesu perfurasaun ne'e, ami hetan mina deskoberta iha perfurasaun ida-ne'e formasaun iha ne'e hanesan mina matan Bayu Undang. Presaun makaas tebes perfurasaun kompleta, ami hala'o ona teste no teste ne'e ami haruka ona ba laboratóriu Indonézia. Ami laran hasolok atu hato'o rezultadu teste bainhira rezultadu ne'e ami simu ona hosi Indonézia,” Filomeno Andrade hateten ba Agência Tatoli iha posu Lafaek, suku Labarai, sesta ne'e.

Durante prosesu perfurasaun mina posu Lafaek ne'e, fó korajen makaas ba kompañia internasionál Timor Resources tanba fó perfurasaun makaas tebes.

“Agora ami bele hato'o ho amostra ne'ebé iha, durante perfurasaun mina ida-ne'e fó korajen makaas no presaun boot tebes. Ami halo perfurasaun hanesan oil ho gás, perfurasaun tahu ne'ebé hatun ba rai okos, ami halo perfurasaun PPZ 17,” nia dehan.

Hafoin karuka amostra perfurasaun mina posu lafaek kompañia hein rezultadu, tanba kompañia haruka ona amostra, nune'e durante perfurasaun posu tolu iha munisípiu Covalima ne'e hetan mina no gás.

“Ami hein, ho ida-ne'e iha indikasaun katak bele iha no hetan rezultadu. Oras ne'e daudaun, ami haruka ba Indonézia, iha prosesu ami servisu hamutuk ho kompañia kontratór tolu. Ami laran haksolok, tinan hitu halo perfurasaun mina matan tolu iha rezultadu hodi hetan mina,” nia hateten.

Tanba, nia dehan, perfurasaun mina matan rua ba dahuluk ne'e, kualidade mina makaas no tebes tuir gravidade American Petroleum Institute (API) ne'e entre 41 to'o 54, ida-ne'e kualidade mina di'ak tebes.

Tuir planu, nia dehan, ba oin kompañia kontinua sei hala'o teste ho tan perfurasaun *appraisiál* posu tolu atu konfirma ida-ne'e, bainhira atu hala'o presiza tan osan.

Entertantu, iha loran 27 fulan-outubru 2021, Primeiru-Ministru Taur Matan Ruak ofisiálmente lansa perfurasaun dahuluk ba kontratu fahé produsaun iha posu Feto Kmaus, munisípiu Covalima ne'ebé hanesan perfurasaun mina dahuluk iha rai-maran hafoin tTimor-Leste Independénsia iha tinan 2002.

Timor Resources halo perfurasaun iha posu Lafaek finaliza ona



Kompania Timor Resources Sobu ona ekipamentu perfurasaun iha posu lafaek, imajen Tatoli/Celestina Teles.

COVALIMA, 26 maiu 2023 (TATOLI)—Jerente Timor Resoruces, Filomeno Andrade, hateten Kompañia Internasionál Timor Resources sobu ona ekipamentu perfurasaun mina postu Lafaek iha suku Labarai, postu administrativu Suai, munisípiu Covalima, tanba perfurasaun finaliza ona.

“Ami oras ne’e daudaun kompleta ona perfurasaun posu Lafaek atinje ona alvu metru 3118. Ita bele hateten prosesu perfurasaun ami hetan mina deskoberta perfurasaun. Nune’e, ami gasta ona osan millaun \$68 maibé parseiru hosi Timor Gap to’o agora seidauk hatama osan uitoan. Iha problema ho Timor Gap, bainhira la rezolve, ami tenke aruma mákina rai iha fatin ida,” Filomeno Andrade hateten ba Agência Tatoli iha postu Lafaek, sesta ne’e.

Maibé, nia dehan, presiza atu rezolve problema entre Kompañia Timor Resources ho Timor Gap, tanba durante prosesu perfurasaun posu Lafaek ne’e, kompañia gasta ona millaun \$68 maibé Timor Gap seidauk fó osan, nune’e kompañia decide sobu mákina perfurasaun.

Tanba ne’e, kompañia Timor Resources sei hein governasaun foun hodi apresenta fali rezultadu perfurasaun ne’ebé mak durante Timor Resources halo.

“Durante prosesu perfurasaun, kompañia Internasionál Timor Resouces hetan mina no gás liu-liu gás mak makaas tebes. Ami sei relata ba Governu foun hodi servisu hamutuk ho Governu foun, nune’e kontinua atividade perfurasaun ne’e ba oin nafatin hodi hetan nia rezultadu di’ak,” nia dehan.

Atividade perfurasaun durante ne’e akontese problema entre Timor Resources ho Timor Gap bazeia ba kontratu komersiál ne’ebé iha, bainhira despeza ne’ebé Timor Resources halo esplosaun liu millaun \$55, tuir loloos Timor Gap tama ona ho sira-nia partisipasaun.

Tanba ne’e, kompañia decide sobu ekipamentu iha posu Lafaek tanba presiza atu rezolve problema kompañia Timor Resources no Timor Gap maibé to’o agora la konsege rezolve, nune’e kompañia sei hapara hala’o atividade perfurasaun.

“Hafoin ne’e, ami sei para atividade hodi hein rezolusaun bele hetan fundu hodi kontinua atividade refere. Atu hahú fali, depende rezultasaun solusaun ba problema agora iha ne’e,” nia dehan.

Aleinde ne’e, nia esplika, kompañia Timor Resources la tula sai ekipamentu perfurasaun importante oras ne’e daudaun rai hela iha Haemane hodi halo manutensaun, maibé ekipamentu ne’ebé tula sai ba Indonézia ne’e ekipamentu ne’ebé la’ós importante liu mak tula sai ba Indonézia.

Entertantu, kompañia Timor Resources sobu ona ekipamentu perfurasaun tanba kompañia finaliza ona perfurasaun iha posu Lafaek atinje ona nia alvu perfurasaun no profundidade 3118 metru.

Jornalista : Celestina Teles Editór : Cancio Ximenes